

Զեօթըն խորհուրդըն արգիլել :
 Զոմանս ի բանտ կու ձրգէր,
 Զայս բռնաւորաց ձեռս մատնէր .
 Զոմանս ծեծէր և հարկանէր,
 Դատաւորօքըն տուգանէր .
 Լեհցոց առջեւ զՀայք նախատէր .
 Պեղծ հերձուածող զնոսա կոչէր,
 Անհաւատ լ'ուրացող ասէր,
 Եւ եւտիքեան զՀայս անուանէր :
 Եւ յիւր ազգերն ինչ աղլիկ կայր՝
 Լեհաց կտրիճներուն կու տար .
 Օր քան ըզօր կու զօրանայր,
 Յետոյ ի դուռն արքային գնար :
 Կամէր զնվիրակն ալ տանել
 Յերկաթի շղթայս զնա ածել :
 Ապա Հայերն շատ դրամ տրվին,
 Հազիւ ձեռացն զնա թափեցին :
 Խորհուրդ մ'ալ չար եղ ի մշտին,
 Թէ քնչ բան ունի նա յիմ թեմին .
 Ղրկեց ի վրայն զիւր հայտուքնին,
 Թէ, թո՛ղ կորչի իմ թշնամին :
 Դարձեալ Հայերն դրամ ժողվեցին,
 Մեծ պարոնաց պարգեւք տրվին .
 Մինչ երեք օր հազիւ կարցին
 Ըզնա պահել իւրեանց միջին .
 Զի էր յաւուրըս ձմերայնի
 Սաստկասառոյց և ցրտայնի :
 Յունվարի մէկն՝ օրըն կաղանդի՝
 Հանին ըզնա խեղճ և լալի :
 Գնաց Կամենից տրտմագին .
 Զոր և անտից ալ վարեցին .
 Մեք մնացաք Լով լալագին .
 Զմեր քահանայսըն փախուցին :
 Թագաւորէն էմրէր հանեց,
 Զիշխանութիւնս Հայոց խըլեց .
 Զվանորայն յափշտակեց,
 Զվախիֆ տընեբն առաւ յիրմէնց :
 Երեք տարի յայս վիշտ կացաք .

Ի յօրինացըս հեռացաք,
 Անհաղորդ լ'անխոստովանանք .
 Մեռեալք մեր մնացին անթաղք :
 Այս ամեն չարքս որ մեզ դիպան,
 Սեւազլխացըն մեր եղան .
 Մեք եմք չարեացս այս պարտական,
 Ի այս ամէն չարքըս մեզնէ ելան :
 Վայ և եղուկ հազար բերան
 Ազգիս Հայոց որ ի Լով կան .
 Ամեն քաղքնին են հանգըստեան,
 Միայն աթոռս է դեգերման :
 Մինչ մեք էաք ի յայս վըշտի
 Ի տառապանս ազգի ազգի,
 Խուլ պատրիարգն Ըստամպօլցի,
 Մեք մեղքն երբ քաղաքն Լովի .
 Որ միաբան հետ Նիկօլի՝
 Մտան երկուքն յեկեղեցի .
 Հնազանդեցաւ Քաղկեդոնի,
 Ի արար ընդ մեզ բազում տաւի :
 Ի ծերութեան ժամանակի
 Ընկեց զօրէնս Լուսաւորչի .
 Գովէր զգործըն Նիկօլի՝
 Դանաւ ի կրօնըս Ֆրանգի :
 Նա զՀայերն հերձուածող կոչէր,
 Ի ամէն ազգաց բաժնած ասէր .
 Պարոնտիրին հետըն չըլէր,
 Յոր տեղ նստէր՝ զՀայս հայհոյէր :
 Լեհ կարգաւորքն երբ զնա տեսան՝
 Մեծ որովայնին հաճեցան .
 Ասին . « Ի Հայք չկայ քեզ նման .
 Ե՛կ դու ընդ մեզ լեր միաբան » :
 Պատասխանեաց նա ամենին,
 Թէ պարոնտէրն է իմ որդին .
 Ես եմ գլուխ և մեծ՝ Հային,
 Սա իմ օրհնածս է և չրախ (1) իմ :
 Իսկ Իլախնուն երիցանին՝
 Որպէս ըզսուրբ զնա պաշտէին .
 Յեկեղեցիս շուրջ ածէին ,

1. Աշակերտ :